



Jumat, 02 Juli 2021

Ogen: 1 Korinti 10:13



Iberekén Tuhan Dalam Pulah



Ersura-sura eme tanda manusia nggeluh janah lit perjuangenna guna ndatken kai sinisurakenna e. Amin lit ka nge kalak si ersura-sura ngenca tapi la lit usahana ndatkensa. Desken kalak si menghayal, erbage sinisurakenna tapi la kai pe ibahanna. Lit ka kalak mbelin kal usahana guna nehi kai sinisurakenna e tapi rusuren gagal. Kelsehen seh ngelabuh ia i bas kai si adapina e.

Renungenta wari enda ngidah erbage sierbahan manusia kote, kelsehen e desken percuban. Janah situasi e, nterem nge kalak si ngalakenca, ngenanamisa, labo dirina saja. Amin bage gia bagi kuan-kuan simegati sibelasken 'uga pe suina ras beratna kiniseran kalak, tetap nge beraten siakap sikerajangenta.' Emaka rasul Paulus mpetetap ukur perpulungen Korinti alu nehken kata maka labo dirinta saja singenanami erbage percuban sibentukna kiniseran, kegagalen, ras sidebanna. Kalak sideban pe ngenanami situasi si bage rupa. Tapi i bas situasi si e labo ipediat Dibata kita ngelabuh sabab iberena kita dalam pulah. Bagi nina megati belas-belas 'bukan hanya satu jalan ke Roma.' Sienda labo instan, minter tersedia iadepenta tapi arus idarami, iperjuangkan, iusahaken.

Anak sigenduari megati ngata kita gelah 'move on' ula ngadi ras belbel je saja. Emaka kita arus ngarak-ngarak ras ndampingi anak si la seh sura-surana. Ula kal kita nalahken ia i bas kegagalen ras keterpukurenna tapi simotivasi, sipegegehi ras si bere pengarapen man bana, lit siterulin asangkan si ukurken kita. Labo menukah i bas situasina si bage rupana tapi adi siusur-usur ngarak-ngaraksa tambah gegehna ngalaken persoalenna. Ibas paksa sideban enggo ia ngasup ndalanisa.